

XLVII.

INSTRUCTIE by PROVISIE.

Voor de *Burgemeesteren van 'sGraven-Hage*, van van 't gunt zy te doen zullen hebben agtervolgende het Disposityf van den Oetroye van der Koninglyke Majesteit.

I.

Eerst sullen Bailliu, Schout, Burgemeesteren voornoemt midden Scepenen van den Hage nomineren den Tresorier, Fabryck ende Excys-Meesteren van den Hage, Bedienders van Excysen, en anderen incompsten van den Haghe, den Werdeyns midden anderen diensten dair anclevende, omme daer vuyt geëligeert te worden by myn Heere den Stadthouder ofte in zynder G. absentie by den President van Hollandt, die dat ancommende jaer dienen zullen. 1560.

II.

Sullen ook Bailliu, Schout, Burgemeesteren en Scepenen van den Hage nomineren de Kerkmeesteren, Heylige Geestmeesteren, Weesmeesteren, Getydemeesteren, Huysfitten ende Leproesmeesteren, omme over te leveren mynen voornoemde Heere den Stadthouder ofte President, omme daer vuyt te eligeren die het toecommende jaer sullen dienen.

III.

Sullen voorts die Schout, Burgemeesteren midden Scepenen eligeren ende stellen alle de Deeckens ende Hooftmans van Gildens, Cappelmeesteren, Pesthuysmeesteren, Vinders, Brootweegers, Waeckers, Brantmeesters, Emmermakers, Boden, als Boschdraggers, Keurmeesteren, Tonsters, Yck-en Huysmeesteren, Sackdraggers, Cruyers, ende generalicken allen anderen diensten, 't Corpus van den Hage behouftig zynde.

IV.

Ende sullen eenen yegelicken van hueren subjecten in den zynen van allen den voersz diensten mogen constringeren te doene rekeninge, bewys ende reliqua van heuren bewindt ende administratie.

V.

Des sal den Officier den gheenen dien 't behoert den behoerlyken eedt afnemen, in presentie van den voersz Burgemeesteren ende Scepenen van den Hage.

B b b 2

VI.

V I.

Die Bailliu, Schout, Burgemeesteren voersz en Scepenen sullen oick by advyse van den Vroetscappe, als 't noot es, maecken generalicken alle de Keuren, en Ordonnantien de Politie ende 't welvaren van den Hage angaende, als op ten brant, en brantschouwe, de beschouwinge van der straeten, plaeten, waeteren, wegen, kaden, buyten en binnen den Hage, op 't broot, koorne, vleysch, visch, bier, wyn, ende andere provianden, coopmanscappen, maeten, gewichten en diergelycken, stellende daer op alzulcken boeten en bruecken, groot en kleyn, als henluyden goetduncken sal, ende als tot hier toe by den Bailliu, Scout en Scepenen van den Hage gedaen es geweest.

• VII.

Des sullen de Burgemeesteren gehouden weesen tot coste van 't corpus van den Hage te sustineren de processen, die vuyt zaeke van dien sullen mogen ryfen, buyten coste van den Officiers, indien 't henluyden goetdunckt, en dat by advyse van de Scepenen bevonden werdt zulcx te behoeren.

VIII.

Sullen oick die voersz Burgemeesteren last hebben 't regt van den Hage te bewaren, allen de processen te beleyden, zoc by justitie als middele van accorde, mits daer over roepende ofte 't selve leggende in deliberatie van Scepenen voersz ende oick vroetscappe, eest noot.

IX.

De Burgemeesteren voernoemt zullen scerp toeficht hebben totten incommen ende vuytgeven van den godden van den Haghe; Oick mede van allen wercken en reparatien, hoedanig die weezen moegen; Ende bysondere scerp toeficht hebben op te policie, neeringe ende welvaren van den *Vlecke van den Hage, Scheveuinge, Eyckenduynen en van de Nyeuweveen.*

X.

Ende als aengaende de justitie, daer en sullen die Burgemeesteren voornoemt nyet mede gemoeyt zyn, maer sullen den Bailliu enden Schout etc in den zynen dair mede laten bewarden, die heurluyden daer mede sullen moeyen, ende nyet metten saecken van den voersz Burgemeesteren; Dan sullen Burgemeesteren voornoemt den Scepenen van den Hage mogen assiteren, als zy te doen sullen mogen hebben in saecken den burgeren, heurluyder Weesen, den Privilegien, Costuymen, Politien van den Hage ofte anderen swaeren saecken beroerende.

XI.

X I.

De Burgemeesteren sullen huer Camere apart hebben ende houden, ende acces hebben tot allen tyden in Scepenen Camere en vergaderinge van Vroetschap te commen.

X I I.

Die voersz Burgemeesteren zullen voer wedden hebben, gelyck in anderen Steden, tot een Tabbaert-laecken alle jaers negen Carolus guldens; sullen voert gelyck in anderen Steden genyeten en profftyeren, gelyck den Scepenen in allen verhueringen van excysen ende anderen verpachtingen van goeden, 't corpus van den Hage angaende; in vercoopingen van Huysen, Landen, Erven, ende anders by decrete van den Hage, van ycken, maeten, tonnen, gewichten, en voerts van allen anderen saecken de politie van den Hage angaende; Welverstaende dat den jegenwoirdigen Schout van den Haghe in zyne emolumenten ende proffytengeduyrende zynen pacht geensins geprejudiceert ofte te cort gedaen sal werden.

Aldus geordonneert by den Prince van Orangen, Grave van Nassau &c als Stadthouder Generael &c, by advyse van den President en andere van Coninglyke Majesteys Raede en Rekeninge over Hollant, Zeelant ende Vrieslant op ten sesden July anno vyftien hondert en 't zestich.

Ondergeteykent,

GUILLAUME DE NASSAU.

Stont noch ondergescreven,

Ter ordonnantie van mynen Heere den Prince van Orangen voersz als Stadthouder van Hollant, Zeelant ende Vrieslant heb ick *Barthout Ernst*, Griffier van den Hove van Hollant voersz dit mede onderteykent op ten vj. July duysent vyfhondert zestig, als boven,

Ende geteykent,

B. ERNST.

Geextraheert uyt het tweede Memoriaalb. van B. Ernst, fol. 21. en geregistreert in het Francyne Register berustende ter kamere van Burgemeesteren van 's Graven-Hage fol. 164.